

# KKM kekal cukai 10 peratus jualan rokok

**Kuala Lumpur:** Keputusan Kementerian Kesihatan Malaysia (KKM) mengekalkan cukai jualan sebanyak 10 peratus terhadap premis menjual rokok disifatkan sebagai langkah terbaik bagi menghentikan tabiat merokok dalam kalangan masyarakat negara ini.

Pensyarah Kanan Jabatan Ekonomi, Fakulti Ekonomi dan Pengurusan Universiti Putra Malaysia (UPM), Dr Norashidah Mohamed Nor berkata, tindakan KKM yang diumumkan Menteri Kesihatan, Dr Dzulkefly Ahmad itu mampu mengurangkan sebanyak 250,000 perokok.

Beliau berkata, keputusan itu juga mampu membantu menurunkan sehingga 80,000 kes kematian pramatang berpunca daripada rokok.

Dr Norashidah yang melakukan banyak kajian mengenai faktor harga dan lambakan rokok seludup dalam pasaran di Malaysia berkata, tindakan berkenaan (menaikkan cukai) akan menyebabkan kenaikan harga rokok dan pada masa sama meningkatkan kutipan cukai

negara yang dianggarkan sebanyak RM5.3 bilion.

Menurutnya, kenaikan harga rokok bukan faktor penting yang menyebabkan lambakan rokok haram di Malaysia.

"Kita di UPM melakukan banyak kajian. Antaranya kesan percukaian rokok ke atas penggunaan rokok dan hasil kutipan serta kajian mengenai kesan cukai ke atas rokok haram juga dilaksanakan."

"Hasilnya mendapati, faktor keberkesanan penguatkuasaan memainkan peranan utama dalam mengatasi masalah lambakan rokok haram," katanya.

Tegasnya, lambakan rokok haram perlu dibanteras dengan penguatkuasaan yang konsisten dan bukan secara bermusim.

Dalam perkembangan sama, Norashidah berkata, kerajaan juga perlu konsisten dalam meningkatkan kadar kenaikan cukai eksais rokok de-

ngan mengira faktor pertumbuhan inflasi dan pendapatan negara.

"Ini kerana cukai eksais terbukti sebagai mekanisme paling berkesan untuk mengurangkan penggunaan rokok dan bukan faktor yang signifikan dalam peningkatan perdagangan rokok haram," katanya.

Terdahulu, pada 5 Oktober lalu, akhbar melaporkan Dr Dzulkefly sebagai berkata, rokok yang dijual di warung kecil, kedai makanan dan minuman serta

kedai runcit tetap akan dikenakan cukai jualan 10% sama seperti di restoran dan semua tempat lain yang menjual rokok.

Dr Dzulkefly berkata, tiada mana-mana tempat yang menjual rokok akan terkecuali daripada dikenakan cukai jualan 10% kerana ia tertakluk kepada Peraturan-peraturan

Kawalan Hasil Tembakau 2004.

**Cara itu  
mampu  
mengurangkan  
250,000  
perokok**  
**Dr Norashidah**

